



CONCELLO
DE
CABANAS

ACTA DA SESIÓN ORDINARIA DO PLENO DA CORPORACIÓN REALIZADA O 25 DE XANEIRO DE 2017.

Concelleiros asistentes:

D. Manuel González López
D. Julián Ramón Seijas Criado.
Dª. Esperanza Gayoso Pereiro.
D. Javier Fernández Brage
D. Delfín Feal Pereira.
D. Carlos Ladra Brage
Dª. Concepción Rodríguez Ferreiro
D. Iago Varela Martínez.
Dª. María Eva García Amor
D. Xosé Manuel Pérez Sardiña

No salón de sesións da Casa do Concello de Cabanas, sendo as dezanove horas e trinta minutos do día vinte e cinco de xaneiro de dous mil dezasete, en primeira convocatoria e baixo a presidencia do Sr. Alcalde Germán Castrillón Permuy, coa asistencia dos Sres. Concelleiros relacionados á marxe e do Secretario titular Antonio López Vila, reúne o Pleno da Corporación en sesión ordinaria segundo a convocatoria remitida ao efecto.

Unha vez comprobada a existencia de quórum para a válida constitución do Pleno, a Presidencia declara aberta e pública a sesión, procédese a trata-los asuntos incluídos na Orde do Día.

PARTE RESOLUTIVA.

1.- APROBACIÓN SE PROCEDE DE ACTA DE SESIÓN ANTERIOR. Dáse conta da acta da sesión realizada o día 28 de setembro de 2016, da cal entregouse copia coa convocatoria a tódolos concelleiros; o Sr. Presidente pregunta se algún membro da Corporación ten que formular algúna observación, e non presentándose alegacións, o Pleno da Corporación en votación ordinaria, co voto a favor dos once membros que o compoñen, acorda aproba-la referida acta.

2.- MODIFICACIÓN ORDENANZA TAXA POR EXPEDICIÓN DE DOCUMENTOS ADMINISTRATIVOS. Visto o expediente tramitado para a modificación do tributo: taxa por expedición de documentos administrativos, e da correspondente ordenanza fiscal reguladora, así como, documentación que consta no devandito expediente co informe de Intervención e ditame da favorable da Comisión de Facenda, co voto particular do concelleiro Xosé Manuel Pérez Sardiña.

Na deliberación do asunto prodúcense as intervencións coas opinións que de forma sintetizada se recollen a continuación:

Polo grupo Socialista, o voceiro Delfín Feal Pereira alude ao xa debatido na xunta de voceiros e na Comisión de Facenda, así como da redución da proposta do epígrafe de participación en procesos selectivos, está de acordo en ordenar os trámites administrativos para non saturar os correspondentes servizos.

Polo grupo Mixto: o concelleiro do BNG, Iago Varela Martínez, non está de acordo en traer este asunto a pleno pois o ve innecesario nestes momentos, na memoria económica fala que procede a tramitación indicando que o importe da taxa non poderá exceder o custo real do servizo ou actividade, cito como exemplo que unha fotocopia na rúa pode realizarse por un prezo de 0,05 euros mentres que na ordenanza se fixa en 0,10 euros, en principio se vai abster.

A concelleira de AEC, María Eva García Amor refírese ao tratado na Comisión de Facenda e a redución da taxa de exames que lle parecía un pouco elevada, polo que non ve problema para a súa aprobación.



CONCELLO
DE
CABANAS

O concelleiro de PDDdG, Xosé Manuel Pérez Sardiña entende que hai unha serie de cuestións que se deberían modificar para afectar a dereitos cívicos e dos concelleiros, alude ao exposto no voto particular para substitución da redacción do apartado 4 do artigo 2º, no relativo a solicitudes de membros Corporación, engadir no artigo 5 exención da primeira certificación dentro do ano natural no epígrafe 1, apartados 2,3 e 5 do artigo 7º, substitución no artigo 7º, epígrafe 6, apartado 1 a cancelación inscrpción parellas de feito, e engadir no artigo 10º o relativo aos gastos de envío.

Polo grupo Popular: o voceiro Manuel González López manifesta que na xunta de voceiros foron recollidas varia súxestións para a Comisión de Facenda co acordo de tódolos grupos, esta ordenanza foi aprobada en 2013 sen recibir alegacións na exposición pública nin na súa aplicación; sobre o voto particular solo busca torpedear o traballo e a xestión administrativa, o parágrafo 4 está ben redactado porque os membros da Corporación no exercicio das súas funcións están exentos das taxas; non se pode aceptar o punto 2 porque solo provocaría atrancos e dificultades para resolución de solicitudes; non procede aceptar a modificación do punto 3, esta taxa implantouse na aprobación inicial por gastos mínimos administrativos de xestión, e non punto 4 non é necesario o engadido pois o solicitante do documento sabe o que ten que pagar, espera que a administración electrónica solucione, recoméndalle que revise as ordenanzas dos concellos da comarca e verase que Cabanas segue sendo un dos mais baixos en impostos e taxas.

O Sr. Varela Martínez sobre o voto particular indica que na comisión informativo falouse que tiña unha proposta alternativa a do grupo de goberno pero non chegou a concretar, votará a favor por solidariedade e que se poida seguir tramitando pero o lóxico era que para tomar unha decisión tivera copia.

O Sr. Pérez Sardiña indica que remitiu o voto particular e pensa que chegou copia a tódolos membros da Corporación, na comisión xa dixo que non estaba de acordo e por iso presentou o voto particular na forma regulamentada, considera que os que entorpecen a administración municipal son os do grupo popular aplicando esta ordenanza pois da máis traballo que recadación, o único que a xustifica agora son as oposicións, revisen a conta xeral do ano pasado e verán como este concelleiro pagou as taxas.

O Sr. Alcalde indícale que se pide documentación para as súas funcións non ten que pagar nada, as bonificación contémplanse no artigo 2.

Despois de estudiado o asunto, sométese a votación o voto particular resultando dous votos a favor, dos concelleiros do BNG e PDDdG, cinco en contra dos membros do grupo Popular, e catro abstencións dos membros do grupo Socialista e concelleira de AEC, polo que resulta rexeitado.

A continuación sométese a votación a modificación da ordenanza segundo ditame da Comisión de Facenda, o pleno da Corporación con nove votos a favor dos membros dos grupos Popular, Socialista, concelleira de AEC, un en contra do concelleiro de PDDdG, e unha abstención do concelleiro do BNG, acorda:

1.º.—Aprobar provisionalmente a modificación do tributo local: taxa por expedición de documentos administrativos, así como a correspondente ordenanza fiscal reguladora.

2.º.—Someter a información pública o referido acordo e o texto da ordenanza reguladora polo prazo de trinta días a través de anuncio que se publicará no Boletín Oficial da Provincia e no taboleiro de anuncios da Casa do Concello.



CONCELLO DE CABANAS

3.º.—No caso de que non se presentaren reclamacións no prazo anterior, o acordo adoptado entenderase definitivamente aprobado, procedendo a publicación integra do texto aprobado no Boletín Oficial da Provincia da Coruña.

3.- PROPOSTA PLAN PROVINCIAL DE COOPERACIÓN ÁS OBRAS E SERVIZOS DE COMPETENCIA MUNICIPAL (PLAN ÚNICO DE CONCELLOS) “POS+2017”.Vista a circular da Deputación Provincial da data 1 de decembro de 2016 comunicando a aprobación das bases reguladoras do Plan Provincial de Cooperación ás Obras e Servizos de competencia municipal (Plan Único de Concellos) “POS+ 2017, así como, a contía asignada a este Concello; vistas as devanditas bases reguladoras publicadas no Boletín Oficial da Provincia número 226 de data 29 de novembro de 2016, así como o proxectos técnicos das obras a propoñer e ditame da Comisión informativa de Asuntos do Pleno.

Na deliberación do asunto prodúcense as intervencións coas opinións que de forma sintetizada se recollen a continuación:

Polo grupo Socialista: o voceiro Delfín Feal Pereira manifesta que este plan nace por iniciativa da Deputación da Coruña para axilizar trámites e dispoñer da contía conxunta para a súa distribución, xa quedou parte previsto no orzamento de 2017 e as obras propostas son necesarias, inda que unha máis prioritarias que outras, destacando sobre todo o arranxo da escola laica para casa da cultura.

Polo grupo Mixto: o concelleiro do BNG Iago Varela Martínez considera que se está a tratar de aprobar o destino dos fondos do plan único que a Deputación da Coruña por a disposición dos concellos, ademais de simplificar trámites burocráticos presenta a novedade de realizar o reparto de forma segura con criterios obxectivos e non a dedo, adxudicándolle ao concello de Cabanas 415.978,95 euros, contía que vai en aumento segundo aumente a dotación de fondos da Deputación, critica o espectáculo do Alcalde diante da sede da Deputación cando o concello recibe 280.000 euros menos co anterior goberno da Deputación; está de acordo cos investimentos mais lembra tamén a necesidade de amañar moitos camiños e levar auga aos veciños, non se pode facer todo de vez pero pide que traballen por conseguir fondos para este concello.

A concelleira de AEC María Eva García Amor considera que neste POS vaise investir en obras moi necesarias, tivérонse en conta as aportacións dos grupos, hai outro tipo de obras pero tamén hai prioridades.

O concelleiro de PDDdG Xosé Manuel Pérez Sardiña parécelle ben a cantidade pero inda resulta insuficiente, non da para cubrir as necesidades do concello, o goberno local no orzamento tampouco fixo unha dotación necesaria para cumplir servizos básicos e por iso presentou emenda, indica que o saneamento da travesía do Oito non está resolto, é necesario reponer o saneamento porque hai filtracións a vivendas, non se vai oponer as obras propostas porque son necesarias.

Polo grupo Popular: o Sr. Alcalde en relación co manifestado polo Sr. Varela Martínez indica que fai mal os cálculos, con este Plan o concello de Cabanas perde máis de 80.000 euros, por iso queren o que se recibiu o ano pasado, queren o plan único pero non perder ese diñeiro, está disposto a enviarlle as cifras do que se recibiu o ano pasado da Deputación.

O Sr. Feal Pereira opina que tódolos cartos que poidan chegar ao Concello son poucos, como se utilizan é outra cuestión; en canto a números si o Sr. Alcalde di que hai 80.000 euros menos tamén é certo que a Deputación deixa aberto o plan a máis axudas que o mellor superan esa



CONCELLO
DE
CABANAS

cifra, é un plan que nos favorece, simplifica trámites e permite dispoñer de golpe desta cantidade para ver onde se vai traballar, están abertos a determinar obras necesarias e posibles melloras.

O Sr. Varela Martínez di que o Sr. Alcalde falta a verdade, a información está dispoñible na páxina web da Deputación con claridade e pode comprobarse como o que dixo o alcalde non é verdade.

A Sra. García Amor cuestiona que o dito polo Sr. Alcalde non é verdade pero que o que di a Deputación na páxina web si é verdade.

O Sr. Alcalde sinala que lle parece ben que estean datos na páxina web pero aquí tamén os temos e comprobáronse coas obras que se fixeron o ano pasado, perdemos os 80.000 euros.

O Pleno da Corporación en votación ordinaria, co voto a favor dos once membros que o componen, acorda:

1.- Participar no Plan provincial de cooperación ás obras e servizos de competencia municipal (Plan único de concellos) "POS+ 2017" da Deputación Provincial da Coruña, cuxas bases se coñecen e aceptan na súa totalidade, e solicitar a aplicación da achega e préstamo provincial asignada aos obxectivos que se indican a continuación, separando os que se financian con cargo a "achega provincial 2017", "achega provincial 2016" e "préstamo provincial 2017".

A) Financiamento do pago a provedores:

	Deputación
Achega provincial 2016 aplicada ao financiamento de pago a provedores	--
Achega provincial 2017 aplicada ao financiamento de pago a provedores	--
Subtotal pago a provedores	--

B) Financiamento de gastos correntes:

	Deputación
Achega provincial 2017 aplicada ao financiamento de gastos correntes	91.730,00
Subtotal gasto corrente	91.730,00

C) Financiamento de investimentos

ACHEGA PROVINCIAL 2017	Financiamento do investimento		
	Deputación	Concello	Orzamento total
Mellora de camiños municipais: travesía do Campo do Oito, camiño de Limpadoiros e camiño e travesía de Teloi	46.140,41	--	46.140,41
Ampliación da rede de saneamento de augas residuais en Lavandeira	44.821,29	--	44.821,29
Subtotal investimentos achega provincial 2017	90.961,70	--	90.961,70



**CONCELLO
DE
CABANAS**

ACHEGA PROVINCIAL 2016 (Investimentos financeiramente sostenibles)		Financiamento do investimento		
Denominación da obra ou subministración		Deputación	Concello	Orzamento total
Conexión da rede de alcantarillado desde área recreativa de A Veiga a Batán 2ª fase.	112.425,66	--		112.425,66
Subtotal investimentos achega provincial 2016	112.425,66	--		112.425,66

PRÉSTAMO PROVINCIAL 2017		Financiamento do investimento		
Denominación da obra ou subministración		Deputación	Concello	Orzamento total
Reparación edificio da escola laica 1ª fase	88.061,16	--		88.061,16
Subtotal investimentos préstamo provincial 2017	88.061,16	--		88.061,16

Aprobar os proxectos das obras incluídos no POS+ 2017 e que se relacionan nestas táboas.

D) Financiamento dos honorarios de redacción de proxectos:

Denominación do proxecto cuxos honorarios de redacción se solicitan (achega provincial 2017)	Deputación
---	--
Subtotal redacción proxectos	--

E) Financiamento de achegas municipais a outros plans ou programas:

	Deputación
Achega provincial 2017 aplicada ao financiamento de achegas municipais	---
Achega provincial 2016 aplicada ao financiamento de achegas municipais para investimentos financeiramente sostenibles	--
Subtotal achegas municipais	--

F) Redución de débeda con entidades financeira:

Entidade financeira	Número/código do préstamo	Importe de “préstamo provincial 2017” aplicado á redución da débeda
NCG BANCO S.A.	500-0201-25.081-2	32.796,43
Subtotal reducción de débeda con entidades financeiras		32.796,43



**CONCELLO
DE
CABANAS**

G) Resumo:

SUBTOTAIS		Deputación	Concello	Total
A. PAGO A PROVEDORES	Achega 2016	--	--	--
	Achega 2017	--	--	--
B. GASTOS CORRENTES	Achega 2017	91.730,00	--	91.730,00
C. INVESTIMENTOS	Achega 2017	90.961,70	--	90.961,70
	Achega 2016	112.425,66	--	112.425,66
	Préstamo 2017	88.061,16	--	88.061,16
D. HONORARIOS REDACCIÓN	Achega 2017	--	--	--
E. ACHEGAS MUNICIPAIS	Achega 2017	--	--	--
	Achega 2016	--	--	--
F. REDUCIÓN DÉBEDA	Préstamo 2017	32.796,43	--	32.796,43
	Achega 2017	182.691,70	--	182.691,70
	Achega 2016	112.425,66	--	112.425,66
	Préstamo 2017	120.857,59	--	120.857,59
	TOTAL	415.974,95	--	415.974,95

2.- Aprobar o Plan complementario do ano 2017 no que se inclúen os investimentos financeiramente sostibles que a continuación se indican e aprobar os correspondentes proxectos ou pregos de prescripcións técnicas:

Denominación dos investimentos financeiramente sostibles (mínimo do 20% do total da achega e préstamo provincial asignado)	Orzamento
Depuración e rede de saneamento no lugar de Valedoso (Santa Cruz do Salto)	104.215,56
TOTAIS	104.215,56

3.- Declarar que o Concello ten a disponibilidade dos terreos, augas e servidumes para a execución dos investimentos, e que ten resolto todo o relacionado coas concesións e autorizacións administrativas que legalmente sexan necesarias.

4.- Comprometerse o Concello a incluír no orzamento municipal do 2017 os fondos necesarios para fazer fronte á achega municipal dos investimentos incluídos na anualidade do 2017 se a houbera.

5.- Solicitar da Deputación Provincial da Coruña, a delegación neste Concello da contratación e execución das obras ou subministracións incluídas no plan, que se entenderá aceptada si esta se produce efectivamente.

6.- Declarar que o concello non solicitou nin percibiu ningunha subvención doutras Administracións públicas para o financiamento das distintas actuacións incluídas neste Plan,e no



CONCELLO
DE
CABANAS

caso de que existan axudas ou subvencións concorrentes doutras Administracións, achégase o detalle de cada unha delas, acreditándose que a súa suma total non supera o 100% do seu importe.

7.- Autorizase á Deputación Provincial da Coruña a obter as certificacións da Axencia Estatal de Administración Tributaria e da Tesourería da Seguridade Social nas que se acredite que o concello está ao corrente nas súas obrigas tributarias e coa Seguridade Social.

8.- Facultar expresamente á Alcaldía para todo o relacionado coa tramitación e xestión do presente acordo e o correspondente expediente.”

4.- DECLARACIÓN DE ESPECIAL INTERESE EXPLOTACIÓNS GANDEIRAS A EFECTOS BONIFICACIÓN IBI. Vistas as solicitudes presentadas por María Delefina Fraga Otero, José Raúl Romeo Moreira e Mercedes Marisol Carballo Feal con Juan Manuel Suárez Caballo, para que polo Pleno da Corporación se declaren de especial interese ou de utilidade pública as explotacións das que son titulares, a efectos de bonificación do Imposto de Bens Inmobilés de conformidade co establecido na correspondente ordenanza fiscal reguladora.

Vista a documentación achegada con cada unha das solicitudes, o establecido no artigo 14.5 da ordenanza fiscal reguladora do imposto sobre bens inmobles, publicada no BOP nº 243 do 26 de decembro de 2016, e do ditame da Comisión de Facenda do 19 de xaneiro de 2017.

Na deliberación do asunto prodúcense as intervencións coas opinións que de forma sintetizada se recollen a continuación:

Polo grupo Socialista: o voceiro Delfín Feal Pereira considera que hai máis explotación agrarias que podían acollerse, espera que se faga traballo de campo para que estas axudas poidan contribuír a que se manteñan abertas máis explotacións á vista das perspectivas futuras do medio rural.

Polo grupo Mixto: o concelleiro de PDDdG Xosé Manuel Pérez Sardiña tamén lle parecen poucas solicitudes, inda que as explotacións agro-gandeiras foron minguando hai máis que se poden acoller á bonificación, é necesario máis labor informativo, afectando tamén a outro tipo de explotacións do sector primario, con esta idea xa habían presentado a proposta e seguirán traballando.

Polo grupo Popular: o Sr. Alcalde sinala a necesidade de tratar que se unen máis solicitudes, este ano acábase de publicar a ordenanza e houbo pouca marxe, é unha forma de axudar as explotacións agrarias e ao sector primario.

Despois de estudiadas as solicitudes, o Pleno da Corporación en votación ordinaria, co voto a favor dos once membros que o componen, acorda:

Declarar de especial interese municipal por concorrer circunstancias sociais e de fomento do emprego, a efectos de bonificación IBI, artigo 14.5 ordenanza fiscal reguladora do concello de Cabanas, as seguintes explotacións gandeiras:

Titular	NIF	Domicilio explotación
María Delfina Fraga Otero	76401158B	Lg. de Os Lamas, número 11, Pq. Soaserra,Cabanas.
José Raúl Romeo Moreira	32634536C	Lg Os Durás. Pq. Soaserra.Cabanas.
Merecedes Marisol Carballo Feal	76396320A	Lg. O Ribas, Pq. Santa Cruz do Salto,
Juan Manuel Suárez Carballo	32662638Q	Cabanas



CONCELLO
DE
CABANAS

5.- ELECCIÓN XUÍZ DE PAZ SUBSTITUTO DE CABANAS. Visto o expediente incoado en virtude de comunicación do Tribunal Superior de Xustiza de Galicia, para nomeamento de Xuíz de Paz substituto do xulgado de Paz de Cabanas, no que consta informe de Secretaría sobre a lexislación de aplicación e procedemento a seguir.

Visto que no período de presentación de solicitudes de acordo cos anuncios publicados no BOP nº 238 do 19 de decembro, e taboleiro de anuncios da Casa do Concello se presentaron tres solicitudes que corresponden a D.Diego Valentín Garrote Fraga e Dª.Sabela Galdo Fernández.

Vistas as solicitudes presentadas coa documentación que achegan, segundo o establecido no artigo 101 da Lei Orgánica 6/1985, de 1 de xullo, do Poder Xudicial, procédese a elección, D. Diego Valentín Garrote Fraga non presenta a documentación requirida na convocatoria apartados d) e c) polo que se exclúe como candidato, quedando como única candidata a aspirante Dª. Sabela Galdo Fernández,procédese a elección e obtén once votos de once membros que componen a Corporación e polo tanto acadando a maioría absoluta do Pleno da Corporación, resulta elixida para o cargo de xuíz de Paz substituta de Cabanas.

Dar traslado do presente acordo e expediente, ao Xulgado de 1^a Instancia de Ferrol, para que o eleve a Sala de Goberno do Tribunal Superior de Xustiza de Galicia.

6.- NOMEAMENTO DE REPRESENTANTE DA ADMINISTRACIÓN ACTUANTE NA XUNTA DE GOBERNO DA ENTIDADE URBANÍSTICA DE CONSERVACIÓN DO POLÍGONO INDUSTRIAL DE VILAR DO COLO. Vista a proposta da Alcaldía que se transcribe:

“Con motivo da creación da entidade urbanística de conservación do Polígono Industrial de “Vilar do Colo” nos termos municipais de Fene e Cabanas.

A Corporación Municipal de Fene en sesión ordinaria realizada en data 3 de abril de 2003, e do Concello de Cabanas en sesión de data 20 de maio de 2003 respectivamente, aprobaron a Constitución do Proxecto de Estatutos da entidade Urbanística de Conservación do Polígono Industrial de Vilar do Colo, publicado no BOP con nº 250, xoves, 30 de outubro de 2003, edito conxunto dos concellos de Fene e Cabanas para a publicación dos estatutos de dita Entidade.

No Artigo 26º Elección dos membros da xunta.

A elección dos membros da xunta de Goberno será a da lista pechada, con indicación expresa de cargos, más votada pola Asemblea, a excepción do Representante da Administración actuante que será nomeado polo pleno do Concello.

Polo que se propón ao pleno do Concello de Cabanas a Germán Castrillón Permuy como representante do concello para a entidade urbanística de conservación do Polígono Industrial de Vilar do Colo.”

O Pleno da Corporación en votación ordinaria, con nove votos a favor dos membros dos grupos Popular, Socialista e concelleira de AEC, un voto en contra do concelleiro de PDDdG, e unha abstención do concelleiro do BNG, acorda prestar aprobación a dita proposta.

7.- ADHESIÓN AO CONVENIO DE COLABORACIÓN ENTRE A XUNTA DE GALICIA E A FEGAMP SOBRE HSUE. Visto o escrito da Dirección Xeral de Inclusión social sobre a migración de SIUSS A SIUSSGAL e a integración de SIUSSGAL coa Historia Social Única Electrónica (HSUE) para cuxa posta en funcionamento foi asinado un convenio de



CONCELLO
DE
CABANAS

colaboración entre a Xunta de Galicia e a FEGAMP, así como, a conveniencia de adhesión para os concellos de cara e evitar situacions de inseguridade xurídica no tratamento de datos de carácter persoal por parte dos servizos sociais comunitarios municipais.

Visto o convenio de colaboración entre a Xunta de Galicia e a Federación Galega de Municipios e Provincias (FEGAMP) para a implantación da Historia Social Única Electrónica nas Entidades Locais da Comunidade Autónoma de Galicia asinado en data 11 de novembro de 2016.

O Pleno da Corporación en votación ordinaria, co voto a favor dos once membros que o compoñen, acorda:

Solicitar a adhesión ao Convenio de Colaboración entre a Xunta de Galicia e a Fegamp para a implantación da Historia Social Única Electrónica nas entidades locais da Comunidade Autónoma de Galicia, e en consecuencia, manifesta:

A vontade do concello de Cabanas de adherirse formal e expresamente a todas e cada unha das cláusulas do convenio mencionado, asumindo as obrigas e compromisos derivados do mesmo e con suxeición plena a todas elas.

8.- ACCESIBILIDADE DE PERSOAS CON DISCAPACIDADE: PROPOSICIÓN GRUPO SOCIALISTA. Vista a proposta do grupo municipal Socialista con motivo do día internacional das persoas con discapacidade, na cal fai referencia a celebración o día 3 de decembro do Día Internacional das Persoas con Discapacidade, decidida pola Asemblea General das Nacións Unidas en Resolución 47/3, no ano 2006 tamén aprobou a Convención Internacional sobre os dereitos das persoas con discapacidade; no ámbito europeo cita a Estratexia Europea sobre Discapacidade 2010-2020 para garantir a accesibilidade aos bens e servizos públicos; a nivel estatal o Real Decreto Lexislativo 1/2013, de 29 de novembro, polo que se aproba o Texto Refundido da Lei Xeral de Dereitos das Persoas con Discapacidade e a súa Inclusión Social, co obxecto de garantir o dereito a igualdade de oportunidades e de trato as persoas con discapacidade. Alude tamén ao anteproxecto de lei dos dereitos e atención as persoas con discapacidade, plans de actuación global a nivel municipal con medidas concretas e continuadas no tempo que lles permitan máis autonomía e maiores cotas de accesibilidade, aspiran a un concello con maior equidade e sen discriminación na que todos teñan garantido o benestar, estimando que son moitos os ámbitos nos que se pode incidir, e propoñen a aprobación dos seguintes acordos:

1º. Elaboración dun Plan Municipal de Accesibilidade, que contemple, entre outros aspectos, a adaptación paulatina e progresiva e mellora na accesibilidade de edificios, instalacións municipais e espazos públicos, así como a mellora da mobilidade peonil con adecuación de beirarrúas, zonas de tránsito e rebaixe de bordillos. Para facilitar a mobilidade, procederase así mesmo, a adecuación e adaptación progresiva de prazas de aparcamento reservadas para utilización por persoas con mobilidade reducida en todo o Concello, xa que estas son praticamente inexistentes.

2º. Adoptar as medidas necesarias para que o outorgamento de licenzas de apertura de novos establecementos leve aparellada a comprobación do efectivo cumprimento da normativa en materia de accesibilidade.

3º. Dispoñer os medios necesarios para posibilitar a maior accesibilidade posible ao patrimonio e aos recursos turísticos do Concello, así como deseñar especificamente visitas e rotas turísticas accesibles, aumentando a súa oferta progresivamente co obxecto de conseguir que Cabanas sexa considerada como destino turístico accesible.



CONCELLO
DE
CABANAS

4º. Inclusión de cláusulas sociais no pregos de contratación administrativa que prioricen as empresas licitadoras que contraten a persoas con discapacidade, así como adoptar o compromiso, sempre de acordo ado disposto na lei, de non contratar con aquelas empresas que non cumpran coa reserva legal de emprego para persoas con discapacidade.

5º. Adaptación progresiva das áreas de xogo e parques infantís, instalando para elo xogos infantís que posibiliten o seu uso por tódolos nenos e nenas en igualdade de condicións.

Na deliberación do asunto prodúcense as intervencións coas opinións que de forma sintetizada se recollen a continuación:

Polo grupo Mixto: o concelleiro do BNG, Iago Varela Martínez considera a proposta moi completa, recorda que desde o inicio da lexislatura xa presentou varias iniciativas na mesma liña e cree que calquera concello debe ser plenamente accesible, debe ser unha prioridade máxima para calquera goberno.

Polo grupo Popular: a concelleira Esperanza Gayoso Pereiro coincide na necesidade de orientar as políticas públicas cara a accesibilidade universal favorecendo unha sociedade igualitaria, considera que tamén e xusto recoñecer que desde o Concello se está a traballar neste sentido, nas planificacións urbanísticas se contemplan estes principios, case tódolos edificios públicos son accesibles, alude as últimas actuacións en Lavandeira, reserva de prazas para persoas discapacitadas, e as obrigas que establece a propia lei; e canto a contratación o Concello guíase polos criterios establecidos pola Deputación Provincial, inda que gustaría ir mais aló, poderíase estar limitando o acceso a procesos de contratación a pequenas empresas que están a facer un esforzo nun contexto complicado; tamén nas zonas de xogo se contemplara a incorporación de elementos accesibles e reitera a coincidencia coa proposta do grupo socialista, por todo o exposto o voto será a abstención.

Polo grupo Socialista: o concelleiro Carlos Ladra Brage sorpréndelle a abstención do grupo Popular cando están de acordo coa moción, estanse facendo cousas pero poden facerse máis, por iso presentan a moción, fala de zonas con mala accesibilidade como zona comercial do Areal, mentres non ven a humanización hai que darlle medios, gustaríalle que votaran a favor e recorda que a accesibilidade en Lavandeira foi proposta do grupo Socialista.

O concelleiro de PDDdG Xosé Manuel Pérez Sardiña, amosa o apoio a moción, e considera queas propostas serán más factibles desde o goberno, a accesibilidade tamén é crear prazas de aparcamento para persoas con discapacidade especialmente no Areal, non apagar tantas luces en horario de camiñar e reitera o seu apoio e parabéns.

A Sra. Gayoso Pereiro indica que o voto vai ser abstención porque están contemplando a accesibilidade en tódalas obras, entende que hai problemas como no Areal que están pendentes da humanización, esperando que se axilicen os trámites.

O Sr. Alcalde aclara que se absteñen porque se van votar cousas que o mellor non poden cumplir, están de acordo coas propostas e están a traballar nelas, no Areal pediron prazas onde se pode pintar e cumpran coas dimensións, non están en contra pero a humanización da N-651 é fundamental para a accesibilidade.

Debatido o asunto o Pleno da Corporación en votación ordinaria, con cinco votos a favor dos membros do grupo Socialista, concelleiro do BNG e concelleiro de PDDdG, e seis abstencións dos membros do grupo Popular e concelleira de AEC, acorda aprobar a referida proposta do grupo Socialista.



CONCELLO
DE
CABANAS

9.- IMPOSICIÓN TAXA POLA UTILIZACIÓN OU APROVEITAMENTO DO DOMINIO PÚBLICO LOCAL POLAS EMPRESAS TITULARES DE INSTALACIÓNNS DE TRANSPORTE DE ENERXÍA ELÉCTRICA, GAS OU HIDROCARBUROS: PROPOSICIÓNNS DO CONCELLEIRO DE PDDdG E DO CONCELLEIRO DO BNG. O Sr. Presidente indica que hai un ditame da Comisión de Asuntos do Pleno que será o que se someterá a votación. O concelleiro de PDDdG Xosé Manuel Pérez Sardiña quere expoñer a súa proposta, a Presidencia indícalle que pode expoñela pero o que someterá a votación será o ditame da comisión; o Sr. Pérez Sardiña manifesta que “xa empezamos co cortello e isto non é un cortello”; a Presidencia pídelle que sexa respectuoso e indícalle que ten unha advertencia; protesta o Sr. Pérez Sardiña sinalando que non procede a advertencia porque ten un sentido figurado no dicionario, o Sr. Presidente dille que faga a exposición e o Sr. Pérez Sardiña aclara que se refería a un desorden, e a Presidencia faille a segunda advertencia.

A continuación o Sr. Pérez Sardiña na exposición de motivos alude a taxa que pagan as empresas de subministración de enerxía eléctrica, gas, auga ou hidrocarburos pola explotación do servizo a través da ocupación do solo, subsolo e voo, e á vista das sentenzas do TSXG e do TS este Concello pode imponer un tributo pola utilización privativa ou aproveitamento especial do dominio público local motivado sobre un informe económico-financeiro, de feito o estudo baseado no informe do SAI da FEMP cifra o feito imponible no 5% do valor do aproveitamento, fai mención as tarifas da ordenanza fiscal do concello de Arteixo e considera que o Pleno tamén debe dar este paso e gravar a ditas operadoras; tendo en conta as características deste Concello se está a tratar dunha medida fiscal cunha repercusión económica salientables, inda que para levalo a cabo requírese un traballo intenso e complexo, por iso propón adoptar o seguinte acordo:

Abrir e tramitar en 2017, respectando os prazos legais, o expediente de creación da ordenanza fiscal reguladora da taxa por utilización privativa ou aproveitamento especial do dominio público local das instalaciónns de transporte de enerxía eléctrica, gas, auga e hidrocarburos, tendo en conta a documentación engadida (ordenanza número 27 do concello de Arteixo e sentenzas xudiciais do TSXG e TS). Engade a posibilidade de supresión de 2017.

A seguir, o concelleiro do BNG Iago Varela Martínez, expón a súa proposta na que fai referencia as sentenzas do TS avalando que os concellos graven as empresas titulares de instalaciónns de transporte de enerxía eléctrica, gas ou hidrocarburos pola utilización do dominio público local cun cálculo que excede o valor catastral dos terreos e que inclúe a súa utilidade. Estes fallos requieren que as ordenanzas fiscais regulen unha taxa pola utilización privativa ou aproveitamento especial do dominio público local das instalaciónns de transporte de enerxía eléctrica, gas e hidrocarburos; a Lei Reguladora das Facendas Locais estableceu en 2004 que estas empresas están obrigadas a pagar unha taxa o que deu lugar a un conflito xudicial contra as entidades locais que a impulsaron, agora as propias sentenzas avalan as tarifas e a legalidade do gravame dos concellos.

Por elo propón ao Pleno da Corporación a adopción do seguinte acordo:

Iniciar os estudos e xestións necesarias para a tramitación e aprobación, a través da correspondente ordenanza fiscal reguladora, dunha taxa pola utilización ou aproveitamento do dominio público local polas empresas titulares de instalaciónns de transporte de enerxía eléctrica, gas ou hidrocarburos nos termos das sentenzas do Tribunal Supremo que así o avalan.



CONCELLO DE CABANAS

Polo grupo Popular: o Sr. Alcalde fai referencia a eliminar 2017 porque depende doutras administracións e o estudio económico que hai que facer é complicado e o concello non ten medios, no 2009 xa se fixo unha ordenanza semellante e viña cun estudo da Deputación, iso é o que estamos a esperar de que a Deputación ou a Fegamp colaboren para sacar esa ordenanza, por iso iniciar trámites pero terminar en 2017 é complicado.

O Sr. Varela Martínez entende que o texto do BNG podía ser asumible porque xa non se indica o 2017, simplemente iniciar os estudos necesarios para tramitación e aprobación da correspondente ordenanza fiscal.

Polo grupo Socialista: o voceiro Delfín Feal Pereira manifesta que hai unha circular da FEMP que desminte a nota de prensa sobre elaboración de informe, é un tema complicado e o concello non ten capacidade para elaborar o estudio económico-financeiro para esa ordenanza, a propia FEMP di que vai poñer a un grupo a traballar para logo trasladar o estudo aos concellos, o partido socialista propón deixalo sobre da mesa para esperar ese estudo, pero tampouco se oponen a que se inicien os trámites.

A concelleira de AEC María Eva García Amor sen prexuízo de que axuden a FEMP ou FEGAMP, parécelle ben iniciar os trámites, as empresas de gas e electricidade xa nos están explotando e está ben que se grave e devolvan beneficios a través dunha taxa legalmente regulada.

O Sr. Pérez Sardiña estima que unha cousa é iniciar e outra abrir o expediente, para que teña unha formalidade mínima debe abrirse o expediente e logo incorporar os informes e trámites necesarios polo goberno local, nas sentenzas queda acreditado cal é o método de cálculo, hai que deixar claro que unha cousa é o 1,5% e outra este gravame, sente que a proposta do BNG a fixese na Comisión e non na xunta de voceiros que foi cando se explicou esta.

Polo grupo Popular o Sr. Alcalde indica que a ordenanza do 1,5% xa se está aplicando neste concello, opina que pouca diferencia hai entre iniciar e abrir porque hai que esperar, o único que aprobado isto o goberno pode empezar a buscar posibilidades e apoios para elaborar esos informes e ordenanza, FEGAMP, FEMP e Deputación, hai que ir da man dun organismo dese tipo porque o concello non ten medios suficientes, o grupo popular está de acordo en iniciar o expediente pero vostedes terán que poñerse de acordo.

O Sr. Varela Martínez parécelle increíble discutir sobre o punto da moción, si o Sr. Pérez Sardiña prefire o seu texto xa dixo que eran praticamente idénticos, e para que todos votos a favor, quitando iso, non ten problema en votar o texto do Sr. Pérez Sardiña.

Seguidamente o Sr. Presidente da lectura do texto do acordo a votar, e o Pleno da Corporación en votación ordinaria, co voto a favor dos once membros que o componen, acorda:

Abrir e tramitar, respectando os prazos legais, o expediente de creación de ordenanza fiscal reguladora da taxa por utilización privativa ou aproveitamento especial do dominio público local das instalacións de transporte de enerxía eléctrica, gas, auga e hidrocarburos.

10.- REVISIÓN DE VALORES CATASTRAIS: PROPOSICIÓN DO CONCELLEIRO DE PDDdG. Vista a proposta presentada polo concelleiro de PDDdG sobre a revisión de valores catastrais, en cuxa exposición de motivos fai referencia a actualización de valores catastrais realizada no 2008 e que a día hoxe están desfasadas, cita o manifestado polo Defensor del Pueblo ao efecto e o establecido polo Texto refundido da Lei do Catastro en canto a que o valor catastral non pode superar o valor de mercado, insiste en que a valoración do 2008 sufriu unha



CONCELLO
DE
CABANAS

depreciación de case o 50% e que a revisión só pode ser realizada pola Dirección Xeral do Catastro, elo dará lugar a adecuar o valor de mercado á realidade actual de prezos o que producirá unha redución na contía do IBI que están a pagar os veciños; considera que é responsabilidade da Corporación, en especial do Alcalde, atender as necesidades reais dos veciños que están inxustamente pagando o seu recibo do IBI baseado non valor catastral que non corresponde.

Por elo propón ao Pleno o seguinte acordo:

Instar á alcaldía de Cabanas a que inicie os trámites necesarios para solicitar antes do 31 de maio de 2017 a revisión catastral da valoración dos inmobilés perante a Dirección Xeral do Catastro.

Na deliberación do asunto prodúcense as intervencións coas opinións que de forma sintetizada se recollen a continuación:

Polo grupo Socialista: o voceiro Delfín Feal Pereira opina que cando se fala de impostos todos queremos pagar menos, dicir que o valor catastral está agora por encima do valor de mercado é unha hipótese, fai referencia a casos concretos e indica que as revisións poden ser de forma individual ou colectiva, habería que facer un sondeo e ver si é necesario facer esa revisión, esquecemos que estamos nun proceso de aprobación do PXOM o que vai a ter unha repercusión especial nos valores catastrais e habería que sopesar si é necesario facelo agora ou esperar, considera que faltan datos para decidir iniciar agora ou non.

Polo grupo Mixto: o concelleiro do BNG, Iago Varela Martínez indica que o IBI depende do tipo impositivo e do valor catastral, o concello pode decidir cando cambia o tipo impositivo e pode solicitar unha revisión catastral que é distinto dunha regularización catastral, esta revisión sería volver a taxar segundo valores de mercado e pregúntase si compensa facer iso, baixaron realmente os valores catastrais?, o valor da propiedade deprecouse coa crise inda que tamén a inflación foi menor, pero está claro que a día de hoxe os valores catastrais están inflados, compénsalle a veciñanza que baixe o valor catastral?, é unha das medidas a ter en conta para o valor da propiedade, nunha expropiación por exemplo, pero tampouco está prevista ningunha gran infraestrutura, en xeral considera que non hai elemento en contra que supere o beneficio que suporía para a veciñanza a redución non pago do IBI que corresponde ao valor real das súas propiedades.

A concelleira de AEC María Eva Amor tampouco lle cadra o valor catastral, non estaría por enriba do valor do mercado, non ten claro que a proposta responda a un interese xeral e demanda dos habitantes do concello de Cabanas.

O concelleiro de PDDdG Xosé Manuel Pérez Sardiña aclara algunas cuestións, hai datos obxectivos que se publican tódolos anos na Lei de Orzamentos do Estado sobre a depreciación, así como nas leis de acompañamento, cita a depreciación de varios anos, así por exemplo de 2013 a 2014 as ponencias catastrais de 2008 tiñan unha redución do 0,73%, e recorda que para 2018 se aplicaría xa o 100% do valor da ponencia, estanse aplicando valores irreais que os propios orzamentos do Estado reconhecen, xa se perdeu a oportunidade de axustar a valores reais e esta é unha iniciativa para o xeral do veciños que non ten que ver con cuestións puntuais, é unha revisión automática e aprobada polo Estado e este concello reúne os requisitos para facer este tipo de revisión porque transcorreron cinco anos desde a entrada en vigor dos valores catastrais e pónense de manifesto diferenzas substanciais entre os valores de mercado e os que serviron de base para



CONCELLO
DE
CABANAS

aqueles valores catastrais vixentes, a solicitude tense que facer antes do 31 de maio, é unha tramitación especial.

Polo grupo Popular: o voceiro Manuel González López manifesta que unha vez analizados varios exemplos en distintas parroquias do Concello, chegaron a conclusión de que non é recomendable solicitar a revisión catastral dos inmobilés xa que segundo o estudo realizado o valor catastral dentro do termo municipal de Cabanas non supera o valor do mercado, non sendo procedente o recurso xenérico a ponencia de valores nin os valores catastrais que se deriven dela, manteñen a mesma posición que na Comisión e votarán encontra.

O Sr. Pérez Sardiña insiste en que é unha tramitación especial, o goberno do Estado tódolos anos fai unha valoración de canto perderon as propiedades en valor con respecto a distintos anos, a lei e a tramitación que está a proponer é clara, xa se perderon tres anos e vaise a perder o cuarto.

O Sr. Alcalde indica que non lles convence e votarán a favor do ditame da Comisión que foi en contra desta proposta..

A continuación o Sr. Pérez Sardiña por cuestión de orde considera que debe votarse a proposta mentres que a Presidencia indica que se votará o ditame da Comisión informativa que é en contra da proposta, pedindo o Sr. Pérez Sardiña que conste en acta a súa protesta pola maneira de proceder do Sr. Alcalde.

Debatido o asunto, o Pleno da Corporación en votación ordinaria, con cinco votos a favor dos membros do grupo popular, dous en contra do concelleiro do BNG e concelleiro de PDDdG e catro abstencións dos membros do grupo Socialista e concelleira de AEC, acorda aprobar o ditame da Comisión de Asuntos do Pleno e en consecuencia rexeitar a proposta presentada polo concelleiro de PDDdG.

11.- TRANSFERENCIA E GRATUIDADE DA AP-9: PROPOSICIÓN DO CONCELLEIRO DO BNG. Dáse conta da proposta do presentada polo concelleiro do BNG sobre a transferencia e gratuidade da AP-9 e melloras necesarias para a comarca do Eume, en cuxa exposición de motivos alude a que a AP-9 conecta a franxa atlántica e cinco das sete cidades galegas, así como, o seu carácter vertebrador, segue a depender do Goberno Central e explotada por unha concesionaria que impón unhas peaxes desorbitadas que lastran o desenvolvemento da nosa economía, fai referencia a proposición de lei orgánica aprobada polo Parlamento de Galicia para a transferencia a Comunidade Autónoma e o veto do Goberno Central mentres procede ao rescate das autoestradas radiantes de Madrid, o que representa un agravio importante. Por todo elo é importante apoiar a iniciativa do Parlamento de Galicia para superar o marco competencial, e que o concello de Cabanas se sume ao consenso político do Parlamento.

Por todas as razóns expostas propón ao Pleno a adopción dos seguintes acordos:

1.- Instar ao Goberno central e ao Ministerio de Fomento a retirar a desconformidade coa tramitación da “Proposición de Lei Orgánica de transferencia da titularidade e competencias da AP-9 á Comunidade Autónoma de Galicia”, aprobada por unanimidade do Parlamento de Galicia.

2.- Instar a todos os grupos políticos con representación nas Cortes Xerais a axilizar a súa tramitación e aprobala nos termos consensuados no Parlamento de Galicia.

3.- Rexeitar o rescate multimillonario con fondos públicos das autoestradas radiais de Madrid, feito co único fin de salvar á Banca e as construtoras que as xestionan, e instar a que os



CONCELLO
DE
CABANAS

recursos públicos se destinen prioritariamente ao rescate de autoestradas en beneficio das usuarias e usuarios finais, para rematar coas peaxes abusivas da AP-9.

4.- Solicitar a construcción urgente do Enlace na AP-9 á altura de Vidreiro, imprescindible para acabar coas retencións ao tráfico que sufrimos no noso concello, e instar á consideración da gratuidade do tramo da AP-9 entre Fene e Miño, ou, cando menos, entre Fene e ese novo enlace do Vidreiro.

5. Trasladar este acordo aos grupos políticos con representación no Parlamento de Galicia e nas Cortes Xerais, ademais do Goberno Central e a Presidenta do Congreso dos Deputados.

Na deliberación do asunto prodúcense as intervencións coas opinións que de forma sintetizada se recollen a continuación:

Polo grupo Socialista: o voceiro Delfín Feal Pereira sinala que se trata dunha proposición de tódolos grupos no Parlamento a favor de recuperar a xestión da autoestrada, o que busca esta proposta é apoiar esa recuperación, as outras consideración que se formulan son secundarias inda que poidan ser necesarias, xa cando gobernaba o partido socialista en coalición a prioridade era vertebrar o territorio galego con vías de alta capacidade, a xestión autonómica sería máis axeitada e por elo votarán a favor.

Polo grupo Mixto: o concelleiro de PDDdG Xosé Manuel Pérez Sardiña considera que non é realmente Fene-Miño, xa houbo debate e falábase Vilar do Colo-Miño, a peaxe está en Cabanas, habería de incorporar a nova lei que se está tramitando cunha nova opción de consenso que non está recollida na moción; a gratuidade da peaxe da AP-9 complicouse desde que o goberno de Aznar prorrogou a concesión a pesar de estar amortizada, esta Corporación na lexislatura 2007-2011 xa adoptou tres acordos en relación con este tema e foron consensuados coa unanimidade de tódolos grupos, entende que é unha postura positiva para o desenvolvemento do Concello porque a vía prioritaria da N-651 está protexida polo Estado e ten moitas afeccións, desde aquí pouco se vai poder incidir porque isto require unha mobilización maior.

Polo grupo Popular: o concelleiro Javier Fernández Brage presenta emenda aos puntos 3 e 4 para que sexan más axeitados as demandas dos veciños/as de Cabanas, e a adhesión as propostas dos puntos 1,2 e 5; en canto o punto 3 non se mesturar o debate, o importante é defender unha postura unánime para acadar a transferencia da AP-9, o Estado podería ter que asumir indemnización no relativo as peaxes que deixaría de percibir a concesionaria, e no punto 4 solicitan que se elimine o relativo a construcción do enlace de Vidreiro porque non debemos tomar decisións que afectan a outros concellos sen que o soliciten, tamén pide substituir a modificación da gratuidade das peaxes entre Vilar do Colo-Cabanas e Miño e non da peaxe de Fene como está na moción, xa no 2010 se solicitou a gratuidade.

O Sr. Varela Martínez manifesta que inda que a peaxe está en Cabanas o tramo que se considera de pago remata en Fene, en aras de consenso acepta a proposta do grupo popular e ánimalles a que en próximas ocasións fagan propostas antes de votar non por non.

A concelleira de AEC María Eva García Amor de que lle ofrece algunha dúbida o dos tramos, sempre teremos atribucións no noso Concello, si se quite ese punto está a favor.

A continuación o Sr. Presidente somete a votación a proposta presentada coa supresión do punto 3 e emenda do punto 4 eliminando o enlace de Vidreiro e substitución da gratuidade da peaxe entre Vilar do Colo-Cabanas e Miño e non de Fene, resultado aprobada co voto a favor dos once membros que componen a Corporación.



CONCELLO
DE
CABANAS

PARTE DE CONTROL ÓRGANOS DA CORPORACIÓN.

12.- INFORMES DA PRESIDENCIA.

a) Resolucións da Alcaldía. Dáse conta das resolucións ditadas desde a número 566 do 25-11-2016 ata a número 025 do 20-01-2017.

13. ROGOS E PREGUNTAS.

a) Preguntas orais.

a.1. Grupo Socialista: Intervención da concelleira Concepción Rodríguez Ferreiro.

a.1.1. Recentemente estiveron reparando as pasarelas do piñeiral, algo que xa levan tempo reclamando por producirse caídas dos usuarios, agora estaría ben tamén reparar as láminas de madeira deterioradas, hai algúns furados perigosos, roga se tome en consideración.

a.2. Intervención do concelleiro do BNG Iago Varela Martínez.

a.2.1. O seu compañeiro de partido no concello de Fene Gumersindo Galego o acusa de perder unha subvención para as obras de mellora entre as rotondas do polígono de Vilar do Colo, esta subvención estaba liderada por Cabanas que recollía un 70% dos investimentos, máis a capacidade da empresa contratada por este goberno municipal para corrixir os errores en prazo fixo que se perderan cartos, desde o BNG gustarían saber como valora o Sr. Alcalde esa acusación do seu compañeiro de partido e si ten algo que dicir sobre este tema.

Resposta Alcalde: non coñezo esas acusacións polo tanto non as poido valorar, vamos poñer 50-50.

a.2.2. Este concelleiro rexistrou un escrito o 2 de decembro solicitando información sobre as liñas telefónicas contratadas polo Concello e outro o 5 de decembro pedindo explicacións sobre o acontecido coa ponte de Vilar do Colo, ata agora non teño resposta por parte da Alcaldía maila que a lei obriga a responder a estes escritos, quería saber si é unha práctica habitual deste alcalde o non responder as solicitudes que se fan e si ten previsto contestar, e en caso afirmativo cando.

Resposta Alcalde: loxicamente lle contestaremos pero sería porque non houbo tempo.

a.2.3. A semana pasada a prensa fixose eco da citación en calidade de investigados a 7 dos 9 concelleiros do PP no concello de A Valga, polos presuntos delitos de malversación e prevaricación derivados do cobro polas asistencias do rexedor e dos seus edís a unhas reunións semanais denominadas comisións de coordinación, neste Concello temos unha figura semellante que é a xunta de delegados de carácter semanal e pola que os concelleiros do PP Manuel González López, Julian Seijas Criado, Esperanza Gayoso Pereiro e Javier Fernández Brage, así como, a concelleira de AEC M^a. Eva García Amor perciben 150 euros por sesión, podería asegurar o Sr. Alcalde que eses cobros son plenamente legais e que hai garantía xurídica para que o goberno municipal de Cabanas non se vexa envolto nunha situación semellante a de Valga?

Resposta Alcalde: creo que vostede o que quere é buscar petróleo onde non hai petróleo, iso é a contestación, vostede non asistiu aos plenos e non sabe o que se aprobou?

a.3. Intervención do concelleiro de PDDdG Xosé Manuel Pérez Sardiña.

a.3.1. En setembro de 2015 o Ministro Cristóbal Montoro introduciu a obligación a todos os concellos de contar con tesoureiro con oposición nacional superada, polo xeral esta orde non se



CONCELLO
DE
CABANAS

aplicou, non se avanzou na dotación do devandito técnico en tódolos concellos nin se modificou esa esixencia; a falta da lei de acompañamento dos orzamentos de 2017 deixou sen cobertura este adiamento da norma que se aplicou en 2016 e Cabanas está entre esos concellos que non contan con tesoureiro segundo a esixencia de Facenda, cuestión que se vai volver difícil de solucionar á vista das vacantes existentes en todo o Estado en relación a este asunto, que ten previsto facer o goberno local ante esta situación?

Resposta Alcalde: pois darle a acumulación ao Secretario-Interventor.

a.3.2. Acaba de saír a licitación o proxecto de demolición da 2ª fase do Penso e non cumple a sentenza, recentemente puidemos ler na prensa como hai veciños da 1ª fase descontentos coas obras, cando van certificar a obra de demolición da 1ª fase para trasladarla ao TSXG?

Resposta Alcalde: cando estea rematada se certificará.

a.3.3. En relación aos chalets de Cardeita, a Valedora do Pobo emitiu unha Providencia en meses pasados por inactividade e falta de colaboración da Alcaldía, a este respecto o Concello está a esixir o cumprimento do dispuesto na resolución 70/2013 e a constatar se os axustes establecidos nela se realizaron antes de permitir a continuación das obras paralizadas mentres non existan os informes técnicos que así o acrediten?

Resposta Alcalde: Hai informes técnicos que acreditan o cumprimento.

a.3.4. Sobre a situación das mesas e cadeiras na beirarrúa da zona comercial do Areal recibimos bastantes queixas de veciños e veciñas sobre a mingua do paso que están a provocar estes locais, o goberno local vai actuar para que se cumpra a ordenanza correspondente?

Resposta Alcalde: pois claro que vai actuar.

a.3.5. Rogo. Comprobamos que as luces do Nadal tardaron moito en retiralas totalmente e suxerímoslle ao goberno local que proceda a súa retirada con maior axilidade, estiveron gastando case todo xaneiro.

Resposta Alcalde: estamos niso.

a.3.6. Rogo. Sobre os servizos na zona comercial do Areal suxírolle ao goberno local que procure unha situación más axeitada para o colector de papel e cartón que está na beira da N-651 a altura de Xicos, que mellore a iluminación e tamén que marque nesa zona unha praza cando menos para persoas con discapacidade.

b) Preguntas por escrito.

b.1. Preguntas presentadas polo concelleiro do BNG Iago Varela Martínez en escritos de data 23 de xaneiro de 2017.

b.1.1. Durante os últimos anos, a expansión da vespa velutina ten causado importantes problemas no conxunto do pais, ameazando tanto a diversidade como as actividades apícolas, así como a saúde da poboación, particularmente alérgica. Cabanas non foi unha excepción, e durante os últimos anos viñeron atopándose un importante número de niños, o que levou incluso a aprobarse mociones neste pleno ao respecto.

Por esa razón, o BNG desexa ter resposta ás seguintes cuestiós:

- Cantos avisos foron recibidos o ano pasado por parte do Concello para a retirada de niños de velutina?

- Cantos niños foron retirados durante o pasado ano 2016?

- Cal foi o tempo medio de espera desde o aviso até a retirada?



CONCELLO
DE
CABANAS

- Cal é o protocolo ao respecto, se o houber, que se está a seguir na actualidade no Concello de Cabanas?

- Que avaliación fai o goberno municipal do devandito protocolo?

Resposta concelleira delegada María Eva García Amor: recibíronse 165 avisos e foron retirados 130 niños, o último o 5 de decembro, a partir de aí por protocolo da Xunta se consideran inactivos e estase a traballar cara o trampeo para o mes de marzo-abril, o tempo medio de espera entre aviso e retirada depende da accesibilidade do niño, dos medios e da urxencia, dáse prioridade aos de zonas poboadas, se está seguindo o protocolo de Medio Rural da Xunta de Galicia, pero estase traballando con varias entidades para combinar esforzos, recollendo botellas para trampeo caseiro combinado co colextivo, co KDM e intentar diminuír o impacto da velutina no Concello.

O Alcalde indica que a valoración é moi positiva.

b.1.2. Nos últimos meses incrementáronse as queixas da veciñanza polo labor de asistencia técnica da empresa concesionaria do mantemento do servizo de alumeadoo público. De maneira recorrente as veciñas atópanse con situacions esperpénticas, como son os seguintes exemplos:

- Veciñas que denuncian ter que agardar varias semanas para que a empresa vaia amañar un punto de luz.

- Veciñas que denuncian que a empresa concesionaria, ao ir amañar un punto de luz, deixa o poste sen foco, que só é reposto se se protesta no concello.

- Zonas que levan varias semanas con fallos constantes, sen que a empresa concesionaria achegue unha solución.

Ante esta situación, o BNG desexa ter resposta ás seguintes cuestiós.

- Ten constancia o goberno municipal destas incidencias e do péssimo servizo técnico que está a dar a empresa concesionaria do alumeadoo público no concello de Cabanas?

- Realiza o Concello de Cabanas un seguimento da empresa concesionaria para verificar o cumprimento do contrato?

Resposta concelleira delegada María Eva García Amor: leva pouco tempo ao fronte pero non ten constancia de que as veciñas agarden varias semanas para que vaia amañar o punto de luz, gustaríalle que dixerá onde e cando, hai un teléfono de incidencias para estas cousas, se pode ser indicando rúa e número par localizar que se localice rapidamente pola empresa, cando se da un aviso se comproba e que da rexistrado nunha aplicación para facer o seguimento.

b.1.3. Para o pleno de setembro de 2015 o BNG tiña presentada unha pregunta escrita na que daba conta de que en diferentes zonas do concello, nomeadamente nas zonas rurais, a veciñanza queixábase da escaseza e ausencia de colectores amarelos, empregados para a separación de residuos máis básica (envases de plástico, latas e bricks).

A suspensión de dita sesión plenaria impidiu que o alcalde puidese responder á pregunta en pleno, áinda que si o fixo na comisión de asuntos de pleno celebrada antes do pleno de outubro dese mesmo ano. En dita comisión o alcalde informou de estar en contacto coa Consellería de Medio Ambiente para recibir novos colectores para a reciclaxe.

Pasado un ano e catro meses desde esa pregunta, a situación segue a ser a mesma.

Por esa razón, o BNG desexa ter resposta ás seguintes cuestiós:

- Está previsto que o Concello de Cabanas reciba novos colectores para a reciclaxe de envases, papel ou vidro nas próximas semanas?



CONCELLO
DE
CABANAS

- Está previsto levar a cabo algunha campaña de sensibilización da reciclaxe que inclúa o reparto de caldeiros para a separación de residuos ou a promoción da compostaxe nos próximos meses?

Pensa o goberno municipal estudar a modificación da situación dalgúns colectores par facilitar o depósito do lixo pola veciñanza?

Resposta concelleira delegada María Eva García Amor: de momento non, recibíronse fai pouco tempo colectores verdes e varios amarelos que se foron repartindo onde era máis necesario e onde se pedían, insta a todo o que necesite un colector que o fagan saber no teléfono de incidencias, a campaña que se está a levar agora mesmo comezou o 22 e vai a seguir na Asociación de Laraxe o 14-2-17 as 7:30, en San Martiño o 8-2-17 as 7:30 horas, no piñeiral da Madalena o 9-2-17 e en Santa Cruz e Lavandeira o 20-2-17 as 7:30 horas tamén.

b.2. Preguntas presentadas polo concelleiro de PDDdG Xosé Manuel Pérez Sardiña en escrito de data 24 de xaneiro de 2017.

b.2.1. O pasado mes de novembro, o alcalde aprobou por decreto a oferta de emprego público para 2016. Cando ten previsto cubrir as prazas vacantes do servizo de obras? E a praza de policía local?

Resposta Alcalde: dentro do prazo establecido.

b.2.2. A Dirección General de Carreteras do Estado achegou informe condicionado sobre o Plan Xeral de Ordenación Municipal (PXOM) este mes de xaneiro. Que condicións se establecen sobre o PXOM? Representan unha modificación substancial do planeamento en trámite?

Resposta Alcalde: chegou o informe ese que vostede dicía no mes de novembro que era desfavorable, chegou favorable e non ten ningunha cuestión máis.

3. As viaxes do Anduriño foron liquidadas no cabio de 2016. A canto ascenden os ingresos de todo o verán de 2016 por este servizo deficitario?

Resposta Alcalde: neste concello é importante xerar atractivos cos espazos naturais de que dispón, Cabanas ten que aproveitar as oportunidades que lle brinda a súa situación na Comarca do Eume, sendo referente en turismo, si pedimos un estudo económico por isto seguro que leva unha decepción, non é tan deficitario como vostede pensa, somos o único concello que ten unha entrada as Fragas do Eume polo río Eume, somos un concello turístico e polo tanto temos que ter atractivos turísticos, é unha actividade que xera ingresos para as empresas e postos de traballo. Recadáronse 2.560 euros.

b.2.4. Sobre os servizos relacionados cos animais a veciñanza fai as seguintes preguntas que trasladamos. No Concello, existe servizo de recollida de animais mortos?, e de animais vivos?

De ser así, cal é o horario e o teléfono para avisar? Fóra dese horario, a quen se chama ou como se resolve o problema? O devandito servizo, dispón de lector de chip para poder averiguar canto antes se o animal está chipado e avisar o máis axiña posible á propietaria ou propietario?

Os animais recolleitos, onde os levan? Unha vez alí, que lles ocorre? publícanse nalgún sitio?, promociónase a súa adopción? Existe sacrificio cero?

Resposta Alcalde: vostede debía saber que este Concello está dentro da Mancomunidade de Ferrol e desde aí está contratado ese servizo, é público e anunciouse, o protocolo a seguir é: en horario normal policía local do concello de Cabanas, Protección Civil, son os interlocutores válidos para avisos a empresa que ven a recollelos e os leva a base que está en Mougá, funciona as 24 horas



CONCELLO
DE
CABANAS

do día.

5. Onde puidemos comprobar no Boletín Oficial da Provincia que a Demarcación de Costas do Estado promoveu rectificación de deslinde no enlace da AP-9. O goberno local encargou informe aos servizos técnicos municipais sobre esta rectificación? Será tratada en Pleno?

Resposta Alcalde: van informar os técnicos e farase o que proceda.

6. No PXOM de Cabanas non existe estudo de mobilidade e deseñábase un vial estruturante de 16 metros no SUD1, cuestionado agora pola Dirección Xeral de Carreteras do Estado, cunha pendente do 10% que impide a accesibilidade a moitas persoas con discapacidade incumprindo o Decreto 35/2000 de 28 de xaneiro, polo que se aproba o regulamento de desenvolvemento e execución da lei de accesibilidade e supresión de barreiras na Comunidade Autónoma de Galicia.

Por que non se realiza estudo de mobilidade no PXOM? Por que non se dota de carril bici as zonas urbanas de maior aumento de poboación no verán como é no Areal e na Madalena?

Por que non se mellora tamén a mobilidade no contorno da igrexa de Porto que é un punto moi perigoso para peóns e ciclistas?

Resposta Alcalde: pediríalle que cando afirme algo non falte a verdade, primeiro nos di que nos contesta a Demarcación de Estradas sobre o PXOM, agora vostede xa o coñece, quero recordarlle que debe ser máis positivo, cos anos que leva de concelleiro díganos cales foron os seus logros, seguiremos traballando para que Cabanas sexa máis fácil vivir, hai sitios que xa hai carril bici e sitios que se está intentando mellorar a accesibilidade dentro das posibilidades do Concello.

b.2.7. Trasladamos a queixa literal de persoas socias dunha asociación que se queixan de que o concello discrimina a asociación Areanidocar (afectados polo convenio do banco malo) a partir de 2013 que é cando o alcalde asina o convenio co banco malo impedindo a devandita asociación o uso do local municipal das Viñas onde segundo os seus estatutos ten o seu domicilio social. Anteriormente ao convenio o alcalde deixaba reunirse con regularidade a esta asociación autorizándolle o uso do local. Esta asociación está constituída legalmente ao abeiro da Lei 1/2002 , de 22 de marzo, reguladora do dereito da asociación e inscrita no rexistro da Xunta. Esta asociación non pode realizar actividades xa que non dispón de local por culpa do alcalde. O alcalde alega que a asociación non está inscrita no rexistro municipal que é de carácter informativo para o concello pero este non é motivo para impedir a participación cidadá.

O alcalde incumple o artigo 72 da LBRL que di "Las Corporaciones locales favorecen el desarrollo de las asociaciones para la defensa de los intereses generales o sectoriales de los vecinos, les facilitan la más amplia información sobre sus actividades y, dentro de sus posibilidades, el uso de los medios públicos y el acceso a las ayudas económicas para la realización de sus actividades e impulsan su participación en la gestión de la Corporación en los términos del número 2 del artículo 69. A tales efectos pueden ser declaradas de utilidad pública".

Pode o alcalde explicar a discriminación que infrinxe a esta asociación? Por que impide a participación cidadá? Será porque a asociación alegou ao convenio do banco malo, un convenio que segundo palabras do alcalde é "un bo negocio para o Concello"?

Resposta Alcalde: súgolle a dicir que está confundido, para poder ter local teñen que estar inscritos no rexistro municipal, art. 236.1 do ROF,

b.2.8. Soubemos en novembro que había dúas valoracións sobre a Casa de Xan Ares, que agarda desde o verán unha actuación urxente para evitar o seu esboroe. Dous meses despois, non houbo ningún avance concreto, nin sinalización do perigo sequera pola que xa levamos insistido en



CONCELLO
DE
CABANAS

numerosas ocasións. Insistimos cal é o resultado das valoracións que encargou o goberno local? Que avances concretos se produciron desde novembro que non preguntamos?

Resposta Alcalde: estamos a espera do informe do arquitecto municipal, si se atrasa ese informe sacaremos as valoracións dos técnicos.

b.2.9. Na vila de Cabanas, o Concello anunciou a execución subsidiaria sobre a Casa do Teléfono. Pasado o prazo de execución que novas hai sobre este procedemento? Vai actuar o Concello?

Resposta Alcalde: hai un expediente administrativo que segue o seu proceso.

b.2.10. En varios plenos de 2016 preguntámoslle pola parcela das Raiolas no Areal, propiedade do banco Caixabank SA que tomou posesión da tenza este pasado 20 de setembro. Cando enviou o Concello orde de limpeza a Caixabank SA? Dous meses despois da última pregunta que fixemos, xa coñece o goberno local cando se vai realizar a limpeza da devandita tenza urbana?

Resposta Alcalde: o que lle poido contestar é que esa empresa recibiu a comunicación do Concello o 27-12-2016.

b.2.11. No pleno de 24 de maio de 2015 consta que no relativo a bens municipais non existe inventario actualizado de bens municipais o cal é obligatorio segundo o establecido nos artigos do 17 ao 36 do Regulamento 1372/1986 de Bens das Entidades Locais, e debendo ter a súa repercusión na contabilidade municipal. En que situación se atopa a redacción do inventario de bens inmobilres do Concello de Cabanas?

Resposta Alcalde: como ben sabe a Deputación encargouse de facelo, ten unha empresa contratada, trasladámoslle documentación e estara elaborando.

b.2.12. Outra pregunta da veciñanza que trasladamos de xeito literal: A estrada do Barreiro pasaba a ser de propiedade municipal tras as obras e así o afirmaba o Plan de travesías da Deputación (BOP 8-3-2008).

Formalizou o concello a acta de entrega? Producíuse por tanto a mutación demanial pasando a travesía a titularidade municipal e levando o Concello o mantemento da vía ata o km 1,1? No informe da Deputación sobre o PXOM indica uns retranqueos de 5 metros que o arquitecto grafa sobre o plano? Que sentido teñen estes retranqueos se a titularidade é municipal e se os peches foron feitos pola Deputación ao carón das beirarrúas?

Resposta Alcalde: non hai a cesión que vostede di, o concello non aceptará a cesión ata que se finalicen as obras de conexión coa N-651 en Laraxe.

b.2.13. No expediente de modificación de crédito aprobado no pasado mes de novembro aparecen dúas partidas para estudios técnicos que van para o equipo redactor do plan. Se a subvención da Xunta de 150.000 euros para o contrato asinado o 31 de decembro de 2008 finalizou. Renovóuselle o contrato ao equipo redactor do PXOM? Por tanto tempo se renova o contrato? Aínda que é un contrato menor teñen acceso os concelleiros as condicións do contrato e os cometidos polos que se renova?

Resposta Alcalde: está confundido, non hai ningunha finalización de contrato, o que hai que facer é o contrato para adaptalo a nova lei do solo, o contrato inicial segue en vigor.

b.2.14. Respecto ás alegacións do Plan Xeral no artigo 83.3 da Lei 39/2015 os ciudadáns teñen dereito a unha resposta motivada da administración. O Concello leva case tres anos sen contestar as alegacións no trámite de información pública do expediente anunciado no DOG do 26 de febreiro



CONCELLO
DE
CABANAS

de 2014. O informe de participación pública é un requisito que pide a Xunta pero non é unha contestación notificada ao cidadán. Desta forma o concello informa á Xunta formando parte do expediente pero non aos alegantes. Ten previsto o concello enviar por escrito as respostas ás alegacións ás persoas interesadas?

Resposta Alcalde: creo que se explicou varias veces, vostede ten ganas de confundir a xente, as alegacións non teñen valor ata que se traian a Pleno e se aproben no Pleno, que lle vamos a notificar a ningún veciño se non teñen valor.

b.2.15. Na acta do mes de xullo deste ano no punto "4. Actualización do rueiro municipal e rede cultural do Concello de Cabanas" non se realiza contestación motivada tal como esixe a Lei 30/1992 no seu artigo 86.3 "...No obstante, quienes presenten alegaciones u observaciones en este trámite tienen derecho a obtener de la Administración una respuesta razonada". No acordo do devandito punto 4 dise que se notificará o presente acordo ás persoas interesadas que presentaron alegacións, cousa que o concello non fixo e tampouco a aprobación foi publicada no BOP. Os veciños motivan as súas alegacións con argumentos pero o concello non o fai por ocultismo ou por arbitrariedade. Notifíquasellos a resolución ás persoas alegantes ao rueiro municipal?

Resposta Alcalde: se non se notificou é un tema administrativo que se revisará para que se corrixa.

b.2.16. Sobre a situación do saneamento no Camiño Vello do Areal (nome real da denominación inventada Travesía do Oito) confirmamos por terceira vez nos dous últimos anos que se producen reboses de saneamento a vivendas cando se producen fortes choivas. Isto non é más ca a consecuencia dunha rede de saneamento obsoleta que require a súa substitución integral en todo o Camiño Vello, tal e como propuxemos nas nosas emendas ao orzamento para 2017. Malia a que propuxemos a actuación integral sobre o vial, o goberno local fixo unha proposta recortada baseándose en informes parciais da concesionaria do servizo. Suxírolle ao goberno local que substitúa a conducción de saneamento desta rúa antes de acondicionar o vial co fin de evitar maiores prexuízos aos veciños da zona e optimizarlle gastos á Corporación.

Resposta Alcalde: vostede mesmo acaba de dicir que o problema é cando hai choivas moi abundantes, as augas pluviais teñen que ir por rede separada da de saneamento, alguén fixo mal a conexión aí, non se poden conectar esas augas a rede de saneamento.

b.2.17. Á vista de que o planeamento urbanístico en vigor a travesía do Areal é calificada como solo urbano, ademais o proxecto de humanización da N-651 cambia a fisonomía da estrada. O concello segundo o artigo 47 da Lei de carreteras 37/2015 pode solicitar un estudo de delimitación de tramo urbano para que Fomento determine as aliñacións correspondentes.

Tamén pode o concello pedir a delimitación de travesías urbanas e rurais nas estradas da Xunta segundo o artigo 62 do Decreto 66/2016 de Regulamento de Estradas de Galicia. No artigo 38.4 da Lei de Estradas 8/2013 di "que nos tramos urbanos das estradas non se establecen zoas de protección da estrada nin liña límite de edificación" polo que é de suma importancia para o urbanismo municipal.

Visto o exposto, Suxírolle ao goberno local que inicie os trámites para os devanditos estudos, á vista de que ten pendente o PXOM de trámites secundarios.

Resposta Alcalde: sobre estes dous rogos xa foron contestados noutras ocasións, agora o prioritario é o PXOM.



CONCELLO
DE
CABANAS

A continuación a Presidencia levanta a sesión sendo as vinte e dúas horas e trinta minutos da cal estendo a presente acta , e do que eu Secretario, dou fe.

Vtº e prace.

O Alcalde

O Secretario

